

摘藻堂四庫全書薈要

集部

欽定四庫全書薈要卷一萬九千四百十六

集部

皇清文頴卷十五

序

癸丑武會試錄後序

陳廷敬

歲癸丑九月天下貢材武士於京中樞臣請舉會試奉
命拔騎步射及格者七千有奇

上曰爾廷敬其副卿馮溥往衡其文前此未有以詞臣
副執政大臣典會試者蓋異數也臣謏劣聞

命戰栗黽勉祇役既取數如額錄當獻臣得綴言末簡

臣惟國家取士文武殊科然革前代武學師太公之陋
學統於儒師統於孔子文不兼騎射武顧兼策論何也
此非難武士也誠重之也夫武而不文其人任卒伍而
不足任偏裨任偏裨而不足任大將者也兵家者言毋
逾孫吳呂李司馬尉繚諸書令武士合而治之闡中發
策則漢唐宋諸名將已然之迹與夫天下塞障耕屯保
伍諸事旁及莫遺又明示以七書之外之書無不當肆

力矣士苟雅能明習得其要領發為文辭具有倫貫異
日干城貔虎之選取諸此不已裕哉且夫麤獷桀驁者
武士之習也一變其習使人不得以眴桓目之而庶幾
於古之雅歌投壺羽扇綸巾者非沐浴書冊漸摩師儒
不為功若此者非皆論策宜重之明驗乎蓋自古承平
既久勢漸輕武不惟文士輕武武亦自厭其武馴至盡
隳武備而不可振今重武兼重文正所以常重武而不
至於輕也草莽鄙生妄謂先之騎射武士所事也重之

也至於論策則已略允若茲當其罄控縱送無不及格
盡收之奚不可而乃決去留於操觚不亦可以已乎臣

於棘闈中從臣溥後慎簡諸士所作登其可者冀或可
仰佐得人以無孤任使至意復著其說喻天下繼起諸
士使皆知國家文武無畸重決拾之暇卽咿唔而不敢
有略文之心昔周之盛也左之而文無不宜右之而武
無不有方其奉璋戩戩髦士攸宜皆卿大夫之材及其
溥彼涇舟烝徒櫂之皆將帥之選臣知自今以始人材

蔚起克文克武雖成周之盛無多讓矣

欽定四庫全書

卷十五

癸未會試錄序

陳廷敬

欽惟我

皇上統天建極治定功成於今四十有二年歲在癸未
春二月當大比天下士禮臣請典試事者臣自陳昏瞶
既列狀上奏

上弗允命臣廷敬偕臣賜履臣涵臣汝霖典厥事臣廷

敬聞

命彷徨震悚移日伏念臣備官銓曹侍直

內殿恐滋隕越常懷冰兢茲當校士之重寄敢弛夙夜之初心且多士來自草澤山陬海涯皆知

聖人在上道濟羣生文明之化光昭下土夫既人思淬礪俗嚮陶甄臣又何敢不益自鞭策以上思答夫

聖恩下不愧於多士乎今鎖闈畢事錄文以獻例得賜言篇端臣不敢為枝言蕪辭謹識其大者仰冀

省覽焉蓋臣今奉

命而論者文也夫文以載道道命於天傳於人知天之

所以命知人之所以傳夫然後道尊而學正學正而文

興則今日道統之傳文運繫焉此其大者也

臣謹識焉

惟天陰騭下民篤生聖神作之君作之師自伏羲神農
黃帝堯舜禹湯文武皆以聖人之德居君師之位以行
其政教道統之傳常在上而不在下也若有其德而無
其位則不得君師之位以行其政教之實故自孔子以
來道統之傳常在於下揆之天降生民之意豈適如此
哉且夫天道貞觀無往不復故知今日者道統之傳果

在

上而不在下矣在下者傳之師儒僅寄於語言文字而在上者則見諸行事之實我

皇上以聖德而居天位天下大治生民乂安故知道統之傳果在上而不在下也昔孟子謂五百年必有王者興歷叙其傳亦大率以五百年為斷以今考之在上者莫不皆然而在在下者則或不盡然也然而其始之自上以及下其後之由下以歸上者亦莫不皆然也孟子謂

由堯舜至於湯五百有餘歲若禹皋陶則見而知之若
湯則聞而知之由湯至於文王五百有餘歲若伊尹萊
朱則見而知之若文王則聞而知之所謂在上者莫不
皆然也又謂由文王至於孔子五百有餘歲若太公望
散宜生則見而知之若孔子則聞而知之此所謂始之
自上以及下者莫不皆然也又謂由孔子而來至於今
百有餘歲自是以降或千有餘歲或百餘歲或不必百
餘歲若周子若二程子若朱子此所謂在下者或不盡

然也若是者何也天之鄭重夫在上者之傳故以五百年為斷其不必五百年者蓋僅寄之語言文字以衍斯道於絕續之交特在下者之事耳惟是儒師之統轉而屬之帝王則五百年之期斷然其不爽者將復合焉此所謂後之由下以歸於上者莫不皆然也蓋自周子二程子朱子而來至於今五百年矣我

皇上論世知人崇朱子之學頌其詩讀其書存諸德行見於文章舉而措諸天下之民使堯舜禹湯文武之道

常在上而不在下故道統之傳由下以歸於上者此正其時也此乃天之所以降生下民之意也臣嘗伏而思之天下之士涵濡於雅化鼓舞於

皇風者亦已久矣而聖人之道傳之在我

皇上者天下之人將皆知之而其所以朝斯夕斯實用其力者天下之人或未能窺其詳也臣日侍

內廷因得臚舉焉

皇上總攬八紘日有萬幾舉凡立綱陳紀制治綏猷諸

大政事發於

聖衷行於天下者既莫不與古先聖王之道異世而同符矣而勤思至道博極羣書燕閒之頃耽情六籍慈誨青宮訓督

皇子詩書講誦

殿陛之地儼若鄒魯之鄉作為文章巍巍乎與典誥同風至於帖括之文百家之藝盡在

聖明之鑒豈非道統所歸實有本末兼該源流共貫者

與今日者親得

聖人而為君師雖不敢與於大道之傳而亦幸在見知之列將見由文王以來濟濟之多士藹藹之吉人復生於王國以上佐

壽考作人之雅化而時雍風動萬邦黎獻共惟帝臣馴至於矢謨賡歌亮采惠迪之風以幾乎唐虞邕治之盛則道之在上而下被其政教者將永永焉傳之千萬歲而無窮又豈五百年之可以數計者哉謹以告多士者

為

黼黻獻焉

御選古文淵鑒後序

徐乾學

皇上萬幾餘暇稽古右文選定古文淵鑒既成命臣編注別為三集上之

御製序文冠諸篇首範圍羣籍彌綸道要煥乎之章蔑以加矣今年春臣乾學以蒙

恩賜假奉辭

便殿

皇上面諭臣誤為後序以進祇

命屏營退自循省

臣

本下里末儒學術淺狹遭逢際會

備員禁林得縱觀四庫六閣之秘恢廓聞見猶恐無當
聖心隕越

成命而猥以爝火之光仰附星日涓滴之流助潤江河

臣雖愚昧猶自知其不可也然

臣

觀自古之有選本始

於西晉摯虞文章流別一集自後作者繼軌於今所傳
若蕭統姚鉉呂祖謙諸家而外孔邈為文苑之選謝沈
有名文之集唐志楚辭別集總集著錄者八百一十八

家莫不上稟朝命彙成鉅典至考其刪緝之旨其出於宸衷之裁定者十無一二矣我

皇上神明天縱尤殫心於致知格物之學本源而及流體道以盡器多識畜德衡量在心故以之討論今古洞若觀火自臣之緝此書也每篇奏

御必親加評騭指示瑕瑜大抵近道則雖拙猶存悖理則雖工必斥臣備蒙

提誨始悟讀書為文具有體要資以去取藉之成書私

念古人著錄之本今卷帙零落所存不多其存者又未必盡傳而臣決是書之必傳者以悉經

聖鑒之裁定足為後法故也臣以微末獲操鉛槧以從事斯局者六年於茲敢敬述所自竊附於見知之末云

進易論序

李光地

臣惟易之為書也大而言之則六經之原天地鬼神之
奧也切而言之則動息語默酬物應事修之吉而悖之
凶蓋有不可斯須去者然其為書始於卜筮之教而根
於陰陽之道故玩辭必本於觀象而不為苟言占事必
由於極數而不為苟用非徒以象數為先也象數而理
義在焉於戲易豈易學也哉欽惟

皇上講學勤政孳孳不息則應乾之行厚德深仁視民

如傷則配坤之道進君子退小人則察乎否泰之幾憂
盛危明則協乎日中之戒

皇上之體易者可謂至矣神武不殺固已見諸施行自
天祐之吉无不利又已受其顯報

皇上之用易者可謂神矣乃者

特命儒臣以此經逐日進講仰見聖智之默運上符三
古之心傳歷數近代以來未有留心於性命之原研慮
於天人之際如我

皇上者也臣學易將二十年幽居潛玩之餘不無一得
然生質愚蔽不足以窺絕學之全間或劄記所知繫之
每卦每爻以為異日精思明辨之地中遭寇亂未究厥
業僅有易論數篇大抵皆理義象數之淵源易之所由
作者也恭逢

聖世不敢自匿譬則螢燭之微照太陽雖不為之增光
然而積草加膏之勤亦將以之炯炯自秘此臣今日獻
書之喻也伏惟

皇上裁其可否而進退之臣又觀夫序卦雜卦皆以未濟終篇非欲其終於未濟也謂夫雖當已濟之時而常存未濟之心此則所謂懼以終始易之道也故六十四卦三百八十四爻而一言以蔽之終日乾乾是也伏惟皇上垂意焉

進讀書筆錄及論說序記雜文序 李光地

康熙十有九年閏八月之五日

皇上退朝

御乾清門顧問臣光地家居所作文字若干臣不勝惶

懼歸而收拾舊業大抵皆經生家言不足以塵

乙夜之覽又不敢以虛

清問謹以讀書筆錄數十條及論說序記之關於學者
十篇繕寫為一卷進呈而恭為之序曰臣惟學之於天

下大矣自古未有言學者言之自殷高宗與傳說始彼
其所謂多聞學古時敏遜志與夫數學之相半終始之
克念又曰非知之艱行之維艱此皆自後世聰明才智
之士所不屑留意於其間者而彼以天縱之君帝賚之
佐孳孳相勉若將不及是以君則繼成湯嘉靖於殷國
臣則與阿衡媲美于有商學之關於治道有如此蓋古
今之言學者莫不曰帝王之學與儒生異臣以為不然
夫溺於技藝滯於章句以華藻自娛以涉獵相高豈獨

帝王哉雖儒生非所尚也若夫窮性命之源研精微之
歸究六經之指周當世之務則豈特儒者之所用心帝
王之學何以加此蓋高宗所謂恭默以思者性命之源
精微之歸也其所謂學而有獲者經訓之旨也其所謂
監而罔愆者當世之務也此古今言學之宗亦古今為
學之準也肆我

皇上天挺其姿神授之識生知乃復好古將聖而又多
能然皆習焉而不留過焉而遂化詩文字畫歷算工巧

莫不精其道焉而無所滯於心其所以潛思竇體朝講
夕誦積年累月而不懈寒暑風雨而不休則非堯舜之
道不使陳於前也非天人性命之書不以遊於意也臣
愚無知竊謂

皇上非漢唐以下之學唐虞三代之學也臣窮海末儒
蔽於聰明之不足局於聞見之孤陋四十無聞歿身為
耻今太陽之下燭火益微抱卷趑趄隕越無地然臣之
學則仰體

皇上之學也近不敢背于程朱遠不敢違於孔孟誦師
說而守章句佩服儒者屏棄異端則一卷之中或可以
見區區之志焉臣又觀道統之與治統古者出於一後
世出於二孟子序堯舜以來至於文王率五百年而統
一續此道與治之出於一者也自孔子後五百年而至
建武建武五百年而至貞觀貞觀五百年而至南渡夫
東漢風俗一變至道貞觀治效幾於成康然律以純王
不能無愧孔子之生東遷朱子之在南渡天蓋付以斯

道而時不逢此道與治之出於二者也自朱子而來至我

皇上又五百歲應王者之期躬聖賢之學天其殆將復啟堯舜之運而道與治之統復合乎伏惟

皇上承天之命任斯道之統以升于大猷臣雖無知或者猶得依附末光而聞大道之要臣不勝拳拳

進大司樂釋義及樂律論辨序

李光地

臣惟古之王者治定功成則必有作蓋非苟為彌文以飾觀聽而已禮樂不可斯須去身亦不可以一日不行於天下是故尊卑上下截然有制民志定而遜讓之風行者禮之實也君臣父子藹然相親人心和而敦厚之俗成者樂之意也篤其實而舉其文厚其意而修其節則禮樂之用所以著因其節文而求其實意則禮樂之道所以存自漢以來禮樂崩壞不合于三代之意者二

千餘年而樂為尤甚蓋自諸經所載節奏篇章器數律

呂之昭然者而紛紛之說終不能以相一又況乎精微

之旨所謂與天地同其和者哉臣逃亂空山之中僅以

十三經自隨間以暇日叅取經文之及於樂者會萃成

編深思極索追求古人作樂之本與夫羣言旨趣之同

蓋有互相發明者自大舜后夔以至武王周公若合一

契信乎大樂之必易而今之樂由古之樂者斯言不我

欺也居嘗別為樂理樂節樂章樂舞樂器樂律六篇以

諸經之文為主以史記漢書淮南以下諸說為輔將以
下成一家之言上備有司之采條貫已具潤色未完其
已脫豪者則周官大司樂釋義及論說數篇竊不自量
繕寫為一卷進呈伏惟

皇上純誠至孝舜之所以感神也於鑠王師武之所以
求定也文德武功巍然煥然今四方粗靖稽古禮文之
事勢當相沿而起昔魯兩生謂禮樂百年乃可興也臣
竊疑之蓋兩生知高祖之輕儒術故為是言以避召命

耳若夫禮樂則豈可一日不行於天下而必待百年不可知之化哉今四海靡靡風聲頽敝等威無辨而奢僭不可止朕屬無法而鬪爭不可禁奢僭者犯上之階也鬪爭者作亂之本也由此言之辨上下以定其志教親愛以導其和此誠禮樂之實之意其講之豈可一日緩哉記曰無本不立無文不行神而明之者本也舉而措之者文也為宜搜召名儒以至淹洽古今之士上監於夏商近稽自漢唐以降考定斟酌成一代之大典以淑

天下而範萬世臣雖區區末學猶將執持所見與諸儒
上下其議論焉至於建中和之極者一人之事專其業
精其藝者世官之守非微臣所能知也

詩所序

李光地

古者學校四術及孔門之教皆以詩首為其近在性情
察於倫理而及其至也光四海通神明率由是也言志
之義始於虞典夏商之間詩不槩見豈其代遠篇殘抑
忠質之世發於文者希與周自文王有作周公繼之郁
郁乎文哉於斯為盛矣今攷三百之篇出自文武成康
者百二南風之自也小雅治之經也大雅德之本命之
符周頌功之成教之至也其篇皆以文王冠惟周公之

詩自為國風篤世業勤王家蓋周室之所以安危上配文王者也邶鄘以下之為風六月民勞以下之為雅王德降焉政俗哀焉然下則有撫已言傷之音上則有憂國陳善之作蓋性情之不可遏文武之教在乎人心故皆可以興可以觀可以羣可以怨邇之事父遠之事君而其究歸於思無邪者此也朱子鄭衛之說諸儒以為不然今獨信之者謂非是不足以見亂之所生為二南之左契抑雖其流至此猶有秉禮知義無文王而興者

夫然後可以極無邪之變矣惟節南山以下為東遷楚
茨以下為豳雅載芟以下為豳頌乃前儒所未定而今
創說者夫子曰吾自衛反魯然後雅頌各得其所令觀
大雅時世明矣小雅之亂而無緒殆不可詰如毛氏傳
三百年間為篇纔七十餘而出於幽者將三之二是豈
足信乎孟子言頌其詩者必論其世今失其世則又賴
有詩存而可以推而知旁引而得也既知得所之義然
後章求其次句逆其情稱名蹟而不可厭也疊文複而

不可亂也始於夫婦之細而察乎天地之高深發于人
情之恒而極乎天載之微妙夫如是則三百之繁言四
始之宏綱小大兼舉矣夫子教人學詩近則在於牆面
遠則使於四方要其指則曰可以興責其效則曰可以
言嗚呼反之於身而可哉

孝經天子五章衍義序

韓 炎

臣按孝經古無章第篇名自皇侃標天子已下五孝之目而五等之序截然以明蓋孝為王道之本萬化之原故曰夫孝置之而塞乎天地溥之而橫乎四海施之後世而無朝夕推而放諸東海而準推而放諸西海而準推而放諸南海而準推而放諸北海而準然而無所不包者其體施之有方達之有漸能足乎其量而無以加者其用其體則足乎赤子之心無憾於匹夫之賤蔬粟

飲水與尊養四海其致一也其用則各有其地之所得
為與其分之所不可過諸侯不敢擬於天子卿大夫不
敢擬於諸侯士庶人不敢擬於卿大夫其勢然也夫惟
天子之尊足以立乎其體而稱乎其量推一念之愛達
之於無不愛無不愛斯能愛其親推一念之敬達之於
無不敬無不敬斯能敬其親斯須之不受為刻覈為殘
忍為法令繁密為賦歛無藝將不勝兵刑之禍而天下
有重足之憂斯須之不受為傲慢為逸樂為侈靡無度

日泰然於上而天命人心去之矣故天子之孝非特謹
小節勤細行已也在天下安社稷固否耳此愛敬之實
也古之聖王如大舜之夔夔齋慄禹之勤勞湯之立愛
立敬文王之日昃不遑暇食皆本孝道以光大業致盛
治至於武王郊祀后稷以配天宗祀文王於明堂以配
上帝制禮作樂文章備具凡其禮百神和民人而御萬
物者乃至纖悉具舉而皆可法然夫子要而贊之曰武
王周公其達孝矣乎言愛之至敬之至也自聖王不作

人倫廢壞即勤於為治之主不過以政教刑罰整齊天下而內治缺然蓋教化之意微矣夫子舉先王之至德要道切著之為經而三復其文於天子之孝本之以愛敬二人而推之通神明光四海興禮樂移風俗納諫諍美政教其於事親之儀節蓋畧焉而至於諸侯以降則第勉以奉宗廟承祭祀為言行無過服勞奉養而已矣蓋其所施固有廣狹大小之殊而丁寧之意亦少殺矣書曰一人有慶兆民賴之夫天子盡孝於上則諸侯卿

大夫士庶人莫不盡孝於下而治化成矣此自然之序也雖然由天子而諸侯而卿大夫而士庶人此治之有其序也由親親而仁民而愛物此序之又有其序也而或者驚於汎愛博施之說托於一視同仁之大則與異端之所謂無差等無人我者意豈異哉夫子固曰不愛其親而愛他人者謂之悖德不敬其親而敬他人者謂之悖禮且夫不愛其親者亦必不能愛人不敬其親者亦必不能敬人譬諸水然溝澮者可立涸也如草木然

根撥則枝葉必害也人君誠鑒乎此而專以孝親為心
久之仁心漸熟義理精明不敢惡人不敢慢人之一念
油然而生發之不禦而充之不窮於天下也何有不然
千尋之木旦夕而長有是理哉若夫諸儒所定十八篇
前後次第多異同臣按開元間題章名及正義所云皆
以三才章以下為廣叙前六十七章之意則朱子刊誤定
為經文者為不易臣今一以是為宗衍經不衍傳者傳
從經也不衍傳故傳之章第但各存之不復論而傳文之

義固已悉具云

平定三逆方畧序

韓 炎

皇帝御極以來政教覃敷恩澤翔洽薄海內外罔不率
俾方偃戈衅甲以文德懷柔四方煦嫗生息休養萬姓
兼容并覆銷弭孽芽時二三藩臣久分閫於外便蕃錫
予異數有加慮或怙寵而驕盈深欲保全其終始因其
乞骸之陳請爰有勞還之簡書處其田廬豐其廩餼道
里芻秣之費悉戒於有司俾歸故鄉長享菑祿生民無
餽餉之艱士卒無遠戍之苦如天之德甚深甚厚乃滇

逆吳三桂背恩反叛閩逆耿精忠粵逆尚之信相繼煽
亂生民荼毒奄及八年當是時兇渠陸梁鴟張豕突醜
類蔓延蜂結蟻聚仰荷

天威赫濯六師四征戰守機宜悉從

指授三方竊踞次第削平三桂窮蹙首伏冥殛精忠之
信既降復謀叛先後皆伏誅獨三桂孽孫世璠猶困守
一隅逋誅逆命至康熙二十年冬十月大兵平雲南世
璠授首十一月露布至京師

上命宣捷午門擇日告

郊

廟

社稷復

躬謁

列祖山陵念中外軍民勞苦德音誕敷洪恩湛被諸王
貝勒大臣暨外藩王等咸謂功德隆盛恭請上

尊號

上謙讓至於再三未之聽許御史臣戴王縉因疏言

聖武布昭削平禍亂宵旰經營永清大定耿光盛烈曠
古罕有請彙纂成書昭示無極疏上下內閣翰林院集
議以聞禮部尚書武英殿大學士臣覺羅勒德洪等謹
議臣聞歷代紀載功烈俱有成書迄今可考者唐興元
間有紀功述元和間有平蔡錄平淮記會昌間有伐叛
記宋建隆間有龍飛日歷天禧間有聖政記熙寧間有
經武要畧明洪武間彙征伐次第為日歷藏之金匱彼

或借箸臣下不皆獨斷之功亦或蠹茲小醜有如摧枯之易猶揭之簡策炳耀可觀豈若我

皇上神機獨運掃除大憝廸屢弗靖多方之衆降滅無遺孽告厥成功八載之間纖毫無遺箕師不宿老方內乂安至仁大勇巍巍超越前代文之一怒武之七德罔不攸兼於茲茲事體大顧闕而不書雖


聖德高深不自居而覲揚於奕禩者或無以得其詳且何以使夫萬世之為亂臣賊子者懼御史言良是臣等

昧死以請

制曰可於是宣付史館歷次用兵以來平定方畧自康熙癸丑十二年三月始訖於辛酉二十年



皇清文穎卷十五



總校官庶吉士臣張能照

校對官檢討臣郭寅

謄錄監生臣楊金

欽定四庫全書薈要

集部

皇清文穎卷十六

七

詳校官候選知縣臣吳甸華



欽定四庫全書薈要卷一萬九千四百十七

集部

皇清文頴卷十六

序

焦山古鼎圖詩序

汪琬



祀典有彝器彝之為言常也頴者為鐘印者為鼎

鐘鼎固彝器之大者也左氏傳曰諸侯有勲而不廢有績而載則撫之以彝器此天子所以錫有功也然則焦山之所蓄與二王子之所咏殆即其類與予嘗論之古

器之與法書名畫竝重也自宋代始蓋當累世承平之後朝廷無事士大夫讀書好古如歐陽永叔劉原父者爭以博雅相高沿及政和宣和之間天子更勅禮樂亦寢慕三代之法物撙奇索幽取而貯諸殿閣者不可以數計於是李伯時黃長睿薛尚功趙德甫之屬復相次而起莫不規摹其款識研窮其字畫而諷味其文章繪之有圖述之有譜夫然後鐘鼎之器益見尚於世今二王子從登眺之暇摩挲鑑賞作為詩歌以傳道之不啻

數百言迹其風流好事其何減於前宋諸君子哉抑予有感也昔春秋桓公二年書取郕大鼎于宋說者曰取者不當取也又曰得非其有之稱也夫魯桓宋莊其人皆孔子之所深惡然則一賂一取其辱此鼎也多矣此可謂鼎之不幸也至於焦山所蓄者雖嘗見汚嚴氏父子然猶幸而得反其故深自藏匿於窮巖絕壑浮屠氏之精舍固不可以郕鼎者相提而語辟諸山林隱遯之士遭罹患難而卒能潔身以自全豈不尤為可尚也哉

予故竝論之若二王子之詩雄偉奇麗儼然子美退之
復出則有程通判雷山人之評騭在

瀛臺

賜宴序

潘耒

臣聞地天垂象泰交之道以成木火繫交鼎養之義斯著樂有徵招角招之奏禮存三爵二爵之文彤弓湛露播在風詩鄴水釣臺標于傳記自昔哲王有饗有宴將以訓恭儉而示慈惠昭文章而辨等威非直黼黻升猷潤色鴻業而已也至如漢宮長樂依綿蕞以為儀晉代華林緣祓除而成俗栢梁興枚馬之辭曲水盛顏謝之

制昆明池上筆墨橫飛華萼亭中觥籌交錯流湎之塗
寢開莊敬之風邈矣然猶形諸聲詩被之金石鏗鏘炳
煥千載可觀我

皇上亶聰濬哲允武允文法夏后之卑宮師姬文之昃
食歲下蠲租之令朝頒省罰之科轉圜從諫詔鐸遍于
宮廷側席求賢弓旌周于巖壑兢兢業業無怠無荒用
能綏奠寰區削平僭逆一苞三葉之寇駢首檻車射天
逐日之渠傳膏齊斧跨滄溟而斲鰐掩碧落以弋狼治

定功成仁漸義洽于是推恩臣下加賚具僚及萬幾之
餘閒施三接之隆禮歲在作噩月惟孟秋有

詔廷臣特垂曲宴惟瀛臺者天府之奧區宮城之陸海
疏玉泉而作沼象蓬島以為臺洪波浩瀚浸其隈茂樹
蔥蘢蔭其曲紅渠綠茨吐納烟霄繡拱璇題蔽虧日月
天子恒以炎蒸之節清暑于茲羽衛森嚴周廬交屬攀
躋所莫逮簪裾所莫經幸沐

恩榮來遊來矚于是泛蘭橈浮桂楫徜徉乎靈渚瀏覽

乎芳林溯灝氣之空明凌神飈而輕度升降脩阪徒倚
平臯臨清漣以振纓藉細旃而凝睇俄而珥貂宣

詔寵錫自天出內府之織文爛天孫之雲錦題名署氏
望之有輝疊雪披霞服之無數爾乃間花張幕倚樹開
筵授几以班設俎有序甕人執饌膳夫進羞鱠鮮鯉于
蓬池菹芳蓮于玉井腠熊臠豹之味充行方圓調蘭醢
露之珍厭沃薌澤然後流金尊騰羽爵雲漿百斛瓊液
千鍾降天語之溫淳臨重臣以敦勸在公載燕不醉無

歸然而肅雖在庭儼恪在序舍爵有油油之色遷坐無
蹢蹢之容迨乎日晷西靡樹陰東徙相與整冠約帶鵠
立鳬趨瞻拜

闕廷雍容成禮以退斯可謂和樂而不濫恭敬而溫文
者歟微臣幸生昇平之代為侍從之臣屬在末班預逢
曠典豈可使

湛恩沛澤鬱而不宣雖戴高履厚

帝力難名而叩缶擊轅微忱少展云爾

欽定四庫全書

卷十六

甲子科湖廣鄉試錄序

毛奇齡

皇上御極之二十三年值元會初開干支初闢之始禮臣以賓興大典恪遵成例開列諸臣應任選者仰荷

睿鑑命

臣偕臣

某典試三楚伏念天下當蕩平之際東

漸西被海波不揚而三楚介在南服自荆門以南遠至五嶺中間數千餘里前代荏苒殆藉不遺尺寸賴

世祖皇帝方行克詰耆定武功江漢之間幸有寧宇而潢池盜兵又適當黔巫之衝浸淫衡嶽凡鋪敦師旅悉

集之襄樊穀鄧以下與湖湘為控馭卒之

六師張皇皆藉我

皇上聖文神武裒荆深入持玉斧而劈之瀾滄之外洞庭上下重見天日迄于今文德振興賢書進獻者又三年矣古者生聚教訓必須時日而

皇上以存神過化與斯民更始如風之刁唌而萬竅齊發不數年間巖居谷處悉受披拂臣雖鴛劣亦何敢以

文命覃敷不加宣布獨是三物六行互相比較惟恐以

浮文虛夸致妨德藝是必于程硃較墨之間使言行相副始不負我

皇上求賢至意用是惴惴惟謹乃暑雨宵晨既底其地即與二三臣工載厲厥事惟時監臨巡撫中外訪蒞綱紀肅然而提調則布政叅政經理精詳監試則叅議僉事防衛周悉爰集同考試官決題發策進提學僉事所取士而三試之垂簾于堂合衆視而通以一心一若心入重淵而目營四海積若干日得若干人以

覃恩廣額增若干人并取乙卷貢成均者附若干人而

錄文若干首以獻

臣

謹拜手稽首颺言簡端

臣

惟國家

致治莫先用人用人之要在乎言行故三代立賢必以
言揚行舉為旁求之則而成周三載選士必大比其德
行考詢其話言而後升諸宅俊以貯為世用此無他言
者行之表德者言之本也自西京取士有舉有試而分
德與言為二然且試士之目猶尚躬行如所稱賢良方
正孝弟力田者簡拔之中仍不失砥礪之旨故兩漢得

人較後為盛暨隋唐以還廣立科目但以天子親試者
謂之制科而別立秀才進士明經諸科為有司所試舍
此以外別無他途為進身之地而于是以行求言而言
見以言求行而行不可必見夫立言者既欲借言以表
其所得而求言者亦即欲因言以定其生平則疏其辭
矣必矚其情也矚其情矣必覈其義也覈其義矣必覘
其情之何以通與義之何以立也夫如是而衡文之難
也甚矣曩者漢庭制策首重儒術然晁錯內習申韓外

應文學雖孝文之明猶不能辨其醇雜宋代啓高文開
詭習顧劉暉私製新體而應試則謬為方正之語以嘗
有司則雖歐陽之聰亦且為其所蒙昧而絕不之覺況
今人之文不逮晁錯有司之識遠遜歐陽而欲以尺幅
之間燭照數計坐見其敗也乃者兢兢業業殫精敝思
自謂可以告鬼神而終不能少釋于寤寐者以為因言
以求人仍不若因言以求言蓋言有偉肆而非夸者終
不若醇謹而不流于固言有綺麗而非靡者終不若清

真而不隣于薄言有勃窣而非僻者終不若簡易而不
淪于一望而易盡則文字雖微亦即為維持氣運變易
風俗之大道而況高文華國正

聖世迪文教所有事哉夫文體不同要歸一致前代取
士多途總皆以登選之一意行之雖明經明法不一其
科三年二年不一其候兩省禮部不一其地帖括經義
不一其業然其為求賢之旨則一也況今者家共一書
人共一藝上以是求而下以是應閉門造車出戶而合

登明選公夫豈有二姑無論其他即楚材晉用起自春秋而其後三楚人物漢唐輩出諸如黃香孟宗以孝行著易雄李芾以忠義見黃瓊郭翻之方正胥偃鄭獬之氣節龐德公劉凝之之高尚孟浩然皮日休之曠達以致幹辦如龐統向寵品量如孟嘉羅友力學如車胤潘京該博如黃琬李善詞翰如李邕歐陽詢文章如羅含習鑿齒王延壽杜審言輩何一非生其後者所當法式而其合不一以歸于至一有如是也然則言行雖殊求

之惟一而至于文體之變猶次焉者矣臣之所自勉以
勉多士者如此若夫有事茲役有吏臣若若例得並書

歷代名儒傳序

朱 軾

盡天下之人別其業而命之士農工賈四者而已而士
獨以儒稱重之也亦責之也戰國異端蜂起其最甚者
為楊墨挾其為我兼愛之說以誣民而與儒抗顧其為
術淺陋入人不深孟子辭而闢之二家之患亡矣漢初
學者惑于黃老之術儒道大衰迨後佛教興其所論著
較老氏之恍惚杳冥為尤甚而信從者益衆韓子曰古
之民四今之民六古之教一今之教三吾謂天下之人

不歸老即歸釋二氏之學徧天下而儒教幾乎息是教
二而民五農也工商也緇流衲子也無所謂士然非佛
老之過儒者之過也今

聖天子崇儒重道超軼漢唐嘗謂朕所重者大儒真儒
所惡者小儒偽儒也

覺世牖民之盛心至矣盡矣孔子訓子夏曰女為君子
儒無為小人儒即此意也彼佛老方張大其說以為彌
天蓋地而莫能外又竭力殫心以工其術而儒者以其

小且偽者當之有不退然沮喪者乎吾思大儒真儒一也而小與偽有別焉聖人與天地相侶惟其公而已彼小忠小信小廉小謹煦煦之仁孑孑之義皆挾私用智之為害也然小也非偽也一涉于偽則無所不至矣是故有儒而阿諛取容者公孫宏張禹是也有儒而依權附勢者馬融王肅也有儒而毀禮滅義者王弼何晏也若夫不逞之徒以邀名市利之心假託仁義道德之說以惑人聽聞久之而一倡百和別戶分門同者黨之異

者伐之甚而恣其橫議變亂黑白犬吠梟鳴無所不至
猶自號于人曰吾儒也何恠乎學者以儒為汙而相率
入于二氏乎漳浦蔡聞之先生嘗與余言儒之雜揉謬
亂痛心切齒余曰

堯舜在上黜邪崇正千載一時顧欲盡去雜揉謬亂之
穢習莫若表彰先賢使學者知儒術之有真而浮偽者
不得而託庶少贊一道同風之聖化于萬一於是做大
全編次諸儒之例錄漢至元儒者凡若干各訂其本傳

彙為一編曰名儒傳書成有難者曰何休之黜周王魯
王文中子之僭經惡乎取之曰過不掩功也小戴以貪
去官劉向以獻書進不錄可也曰聖之去官忤何武也
或曰九江太守德也非聖也向父得鴻寶祕書於淮南
向欲不獻而不敢非以干進也始于漢而終于元者何
漢儒拾殘經于灰燼之餘有功于道術不小晉唐如范
甯孔穎達之徒類能發明經義以輔翼聖教至宋而濂
洛關閩諸儒直接鄒魯之傳前乎此者開其先後乎此

者皆紹其緒者也明儒未有史傳故弗錄也傳以名儒
稱何也猶言純儒真儒君子儒也學術邪正之分途名
與實而已無所為而為者為君子有所為而為者小人
也學者誠能體察于身心之間存理遏欲進進不已則
聖人可學而至何有于名儒乎所貴乎儒者為其學而
至于聖人也明乎此而章甫縫掖之士能不顧名思義
乎

歷代名臣傳序

朱軾

名臣傳始漢留侯迄元董搏霄凡二百有奇或曰人才
莫盛於虞周五臣十亂盡之矣夏禹啓間類皆先代之
臣殷伊尹仲虺伊陟臣扈巫咸甘盤傳說外他無聞焉
今編名臣若干母乃濫乎曰必如臯夔伊傅周召而後
謂之名臣則得與斯選者幾何且取法乎上僅得乎中
集中所載皆上法古人而卓自樹立者也孟子曰有安
社稷臣者有大人者有天民者如汲長孺魏文貞者非

所謂社稷臣乎漢之武侯唐之宣公宋之韓范司馬第
其品在天民大人之間歟或謂武侯宣公韓范司馬之
有功聖道者不少何以不列於名儒曰天生聖賢以為
天下未有功名不本於道德亦未有道德而不發為功
名者不幸而著書育才以守先待後非得已也程朱之
不為名臣有以夫是故有堯舜而後有五臣有文王武
王而後有十亂漢唐以下遭際不同聲績亦異總其要
歸多由元首我

皇上嘗訓廷臣謂非臯夔稷契成堯舜堯舜實成臯夔
稷契吾君臣其交勉之恭繹

聖言夙夜警惕自念遭遇

聖明不能感發刻勵附日月之末光垂榮施於無窮可
謂上負吾

君下負所學矣爰錄名臣都為一編審其所值之時所
行之事所守之節所建之業或俊偉光明直行已志或
委婉曲折務達其心之所誠然而後已雖不能與臯夔

伊傅周召等量而齊觀要從此日以尚友千載高山景
行其長人神識志氣者豈少哉夫求珠者必于淵求玉
者必于山適伯樂之厩者纖離綠駟惟駕所適願覽斯
集者各取法于上而設身處地叅觀效法以自奮于
堯舜之世書曰汝翼汝為汝明汝聽詩曰有馮有翼有
孝有德行將旦暮遇之矣

歷代循吏傳序

朱軾

傳曰循吏仍史目也吏者蒞也為天子蒞此民也自牧伯監尹下逮一州一邑之長統謂之吏吏得其人則民安民安而天下治矣顧必如何而後為得人曰廉曰才曰慈惠曰強幹四者盡之矣而史傳不以四者名吏而標其目曰循循之為言良也舍四者無所謂良而卒不得謂之廉吏才吏慈惠強幹吏者然則所云循良者可會而知矣論語記仲弓子夏諸賢之為宰嘗問政於孔

子而其為政無可考子賤子游以鳴琴弦歌傳其他亦
未有聞焉漢史稱龔黃卓魯之治郡多異績吾不知其
為政於聖門諸賢何如也宋張觀自謂守官以來惟持
勤謹和緩四字又云世間何事不從忙後錯過蓋為其
事而輒計其效則進銳者退必速即幸而有成而急遽
苟且終遺後日之悔彼悃悃無華之吏循守繩墨而程
能效功日計不足月計有餘況煦育涵濡以養以教事
不煩而民享和平之福此王道之所以悠而久也循良

之目其謂是歟顧吾猶有慮焉庸庸者自託於簡易鎮
靜以文其迂拙固卑卑不足道其或慕古人之雅化而
優遊無為即使子賤鳴琴而理而怨咨愁苦之聲不息
雖日奏南風之曲能使阜財解慍乎有恒產而後有恒
心假而終歲不飽而欲使家弦戶誦吾知子游有所不
能也我

皇上念切民依勤求吏治嘗謂司民牧者存一沽名市
譽之念將有廉而矯激寬而姑息者矣朕非教人以不

廉廉且不可而況於不廉乎非教人以不寬寬且不可而況於嚴乎惟中道而行實政實心上為國而下為民莫善於是大哉聖謨無以復加矣蓋中者堯舜禹湯文武之所以傳心施之於政事即洪範無黨無偏王道平平蕩蕩商頌不競不綌不剛不柔敷政優優之謂也由乎此則處為顏孟周程出為皋夔稷契悖乎此雖一郡一邑可得而治乎今傳循吏若干其所為治雖未必盡有合於

聖訓而優游無為與矯激姑息以立異者槩不錄焉讀者循覽體察庶於吏治或有少補歟

欽定四庫全書

皇清
卷十六

樂善堂全集序

朱軾

雍正元年我

皇上紹登大寶

特命朱軾侍

皇子讀書時

皇四子

皇五子年甫十三歲已熟讀詩書四子背誦不遺一字
已乃精研易春秋戴氏禮宋儒性理諸書旁及通鑑綱

目史漢八家之文莫不窮其旨趣探其精蘊由是發為文章實大聲宏彬彬乎登作者之堂矣雍正八年

皇四子自訂其所作詩文為一集名曰樂善堂文鈔

命

賦

為之序固陋如

賦

何足以知

皇子之文伏念

皇子以樂善顏其堂又以名其集讀者徒以文視文雖揚於諷詠咨嗟嘆賞烏足測斯編之涯涘乎凡人為一事而或作或輟者所樂不存焉耳

皇子之於文窮年累月抽思探蹟俛焉日有孜孜誠有味乎其言之矣然

皇子之所樂者善也非文也如以文而已矣雖如宜僚之弄丸庖丁之解牛得心應手亦徒虛車之飾耳於善乎何與哉樂善之說見於孟子所謂善者仁義忠信而已專言仁則為心之全德而義在其中兼體用而言則仁為體而義為用對忘信而言則仁義又為用而以忠信為之體苟存諸中者有一毫不忠不信求幾於仁義

可得乎易曰立天之道曰陰與陽立地之道曰柔與剛
立人之道曰仁與義陰陽剛柔之流行不息迭運不窮
者誠也聖人之於仁義亦如是而已矣自聖人言之則
為誠誠者天之道也自學者言之則為忠信忠信者思
誠也人之道也思誠之功維何格致以啓其端克復以
踐其實戒懼以立其本慎獨以謹其幾循循於下學以
漸幾於上達久之而私欲潛消理與心融而樂生矣生
則烏可已也烏可已則不知手之舞之足之蹈之天下

娛心快志之事孰有過於此者乎欽惟

聖祖仁皇帝德合乾坤功參化育我

皇上欽明緝熙聖以繼聖本精一執中之心法發而為
蕩平正直之

皇猷萬方臣庶是訓是行矧

皇子天稟純粹志氣清明晨夕侍奉之下其薰陶涵育
於

聖德聖訓者固已日新月盛莫知其然而然矣從此敬

承無數優游厭飫戒於思慮之未萌恭於事物之既接
進德修業之功孰得而窺其所至哉賦嘗聞

皇子之自言其文也曰詩歌賦古三百篇之流吾將以
為山水以為樂音以養吾心焉耳旨哉斯言凡知者之
樂水仁者之樂山以及先儒樂觀天地生物氣象無往
非善即無往非樂無往非樂即無往非養也書曰非知
之艱行之惟艱夫無所得於中而強而行之則不勝其
勞苟從事於窮理盡性而渙然有得疊疊不倦夫何難

之有

皇子勉之哉謹序

欽定四庫全書

卷十六

樂善堂全集序

張廷玉

雍正元年

皇上紹登大寶

命廷玉隨侍

皇四子

皇五子講讀經書蚤夜趨承仰見我

聖祖仁皇帝垂光錫祚烏奕綿洪我

皇上敬承

庭訓以裕後昆

聖學相傳緝熙光大

皇四子粹質天稟明敏博達而功力縝密朝有課夕有
程寒暑靡間有非專攻文學之儒所能希其萬一者自
經史百家以及性理之閫奧詩賦之源流靡不博覽精
擇講明而切究之每發一問立一義輒超出於思議之
表而皆前人所未發覃心實學者之所宜辨析也含咀
釀郁蘊蓄富有時發抒其胸中所見著為論說詩賦諸

體之作常不假思索一揮數千言立就清詞邃旨首尾
爛然數年來俱不下千餘篇

皇子自加選擇得如千首彙為一集以示

廷玉廷玉

受

而循繹焉大抵意義淵深文采博瞻而筆力之雄俊健
捷邁越等倫所闡明者聖賢之精蘊宇宙之名理而所
吐露者經籍之膏腴藝林之芳潤自昔以文章名家者
莫能逮焉

皇子之於文可謂才超而學邃矣抑尤願

皇子之不以此自多也聞之文所以載道古聖賢修已
治人明體達用之大要胥於是乎在匪直工其文詞以
為美觀也故曰非言之艱行之惟艱

皇子以天授之才博通古今之學循循乎祗適

聖訓敬勤無斁誠於載籍之指要平日口誦心惟者既
能言之又允蹈之自此進德修業日新歲益廷玉所樂
得而揚其美盛者詎有涯哉

御製樂善堂全集序

張廷玉

臣聞文以載道而道本于身故必實能明道而文始可貴必實能身體而道始能明我

皇上躬濬哲之姿夙承

庭訓緝熙光明聖學淵茂

臣

自雍正元年蒙

世宗憲皇帝恩命得侍

左右于今十有餘年伏睹我

皇上稽古遜修研精經術于六經四子之書儒先之緒



論諸史之成蹟博觀約取剖析精微舉天人性命之理
政治之所從出皆得其大本大源之所在寒暑晨夕矻
矻孜孜融洽貫穿與道大適故發之于文日新富有麟
炳喬皇充溢絢帙曩者

親定樂善堂文鈔十有四卷

臣既承

命而敬序之矣

御極以來勅幾清宴乃合前後所著選定編次為

樂善堂全集

臣

受而讀之其義蘊之宏深則經緯天地

無乎不包其辭藻之瞻博則鎔鑄古今無乎不備仰泰岱而知衆山之卑觀河海而知行潦之細誦聖言而知百家衆說之凡淺巍巍乎煌煌乎洵宇宙之鉅觀也臣
仰惟

皇上聖學高深固非擬議所及而竊謂其所以發而為至文者由道之蘊積者深也夫道豈獨為文而已聖賢本是道而垂彞訓帝王體是道而成治功

皇上本皇極之敷言既已見諸行事中外欣欣文德誕

被矣而猶夙夜孜孜因言考行所謂

聖天子建中和之極金聲而玉振之者誠在今日而是
編也天德王道合為一焉乾坤之容日月之光與詩書
相表裏而世為天下則又何疑哉臣校錄之次伏讀
御製序文竊有以知

聖心之所存茲奉

命綴言簡末仰至文之炳蔚而拭目以觀至治之日升
海內臣民涵泳

聖澤偕登大道區區蠡測所及蓋不能自己云

皇清文頴卷十六

欽定四庫全書薈要卷一萬九千四百十八

集部

皇清文頴卷十七

序

明史地理志序

張廷玉

自黃帝畫野置監唐虞分州建牧沿及三代下逮宋元
廢興因革前史備矣明太祖奮起淮右首定金陵西克
湖湘東兼吳會然後遣將北伐并山東收河南進取幽
燕分軍四出芟除秦晉訖於嶺表最後削平巴蜀收復

滇南禹跡所奄盡入版圖近古以來所未有也洪武初
建都江表革元中書省以京畿應天諸府直隸京師後
乃盡革行中書省置十三布政使司分領天下府州縣
及羈縻諸司又置十五都指揮使司以領衛所番漢諸
軍其邊境海疆則增置行都指揮使司而於京師建五
軍都督府俾外都指揮使司各以其方附焉成祖定都
北京北倚羣山東臨滄海南面而臨天下乃以北平為
直隸又增設貴州交趾二布政使司仁宣之際南交屢

叛旋復棄之外徼終明之世為直隸者二曰京師曰南京為布政使司者十三曰山東曰山西曰河南曰陝西曰四川曰湖廣曰浙江曰江西曰福建曰廣東曰廣西曰雲南曰貴州其分統之府百有四十州百九十有三縣千一百三十有八羈縻之府十有九州四十有七縣六編里六萬九千五百五十有六而兩京都督府分統都指揮使司十有六行都指揮使司五曰北平曰山西曰陝西曰四川曰福建留守司二所屬衛四百九十有

三所二千五百九十有三守禦千戶所三百一十有五
又土官宣慰司十有一宣撫司十安撫司二十有二招
討司一長官司一百六十有九蠻夷長官司五其邊陲
要地稱重鎮者凡九曰遼東曰薊州曰宣府曰大同曰
榆林曰寧夏曰甘肅曰太原曰固原皆分統衛所關堡
環列兵戎網維布置可謂深且固矣計明初封畧東起
朝鮮西據土番南包安南北距大磧東西一萬一千七
百五十里南北一萬零九百四里自成祖棄大寧徙東

勝宣宗遷開平於獨石世宗時復棄哈密河套則東起
遼海西至嘉峪南至瓊崖北抵雲朔東西萬餘里南北
萬里其聲教所訖歲時納贄而非命吏置籍候尉羈屬
者不在此數嗚呼盛矣論者謂交趾之棄未為失圖而
開平近遷則守衛益薄雖置萬全都指揮使司不足以
鎮服山後諸部故再傳而有土木之變然睿皇自以失
律蒙塵非由經制未備景帝任賢才修守禦國步未移
乘輿旋復由是觀之三衛者一隅之隘而無關大計也

審矣至其季世流寇首禍於西陲浸尋蔓延中原為之
糜爛金湯之固不足以制土崩版宇之廣不足以成犄
角疆圉不蹙於曩時形勝無虧於初盛而強弱懸殊興
亡異數者天降喪亂昏楮內訌人事之乖而非地利之
失也語曰在德不在險詎不信夫今考其升降之差沿
革之故具著於篇作地理志

甲辰科會試錄序

張廷玉

欽惟我

皇上亶聰作后至治誠民運際中天文明炳蔚旁求俊
乂惟日孜孜

御極初元特設鄉會恩科以廣樂育仍

命癸卯甲辰正科於次年舉行甚盛典也越雍正二年
秋八月會試禮部貢士

臣奉

命偕臣軾暨臣敏臣貽直同主試事伏念臣世受

國恩躬蒙

殊眷崇階屢晉

寵渥逾涯元年兩與棘闈榮懼交并祇遵

聖訓幸免罪戾乃以兩年之內三秉文衡遭人臣不世
之遇深恐無以仰副委任至意謹與諸臣共相戒勉晝
夜搜閱得中式文若干卷復甄佳卷之限於額者進呈
欽定再取若干卷事既竣例當錄文以獻臣謹拜手稽
首言曰士不惟科名進取之為榮而遭時之足幸夫聖

帝明王曠世難邁彼唐虞之際百僚師濟野無遺賢成
周盛時菁莪棫樸之化行而卷阿鳴鳳之音繼作讀其
書者未嘗不流連感慕思一置身於其間逮數百千年
以來未有能躋登茲者豈非時之難得也歟
皇上以神靈首出之資當重熙累洽之運繼

聖祖仁皇帝壽考作人之盛恢道德之鴻規蓋唐虞三
代之治於今再見矣而多士得以其修之家者進而為
國家用千載一時其慶幸為何如也抑臣於多士更有

進者臣自元年與南宮之役至今僅十閱月耳今之取

者其什之六七皆向所遺也諸生之文豈盡此妍而彼

媿此工而彼拙臣之鑒又豈闇於前而明於後然而取

舍殊而得失異者蓋有數焉不可強也夫知得失之懸

於數則今之得固可忻而向之失可無憾即今之未得

者亦可以自安矣多士登朝服官異日顯晦升沈淹速

遠近之致萬有不齊得失之數無以異於今日惟恪修

厥職而安於義命庶不流於苟且不肖之歸而進之即

可為臯夔周召之佐臣亦藉以報稱萬一有餘榮焉

聖明在御如日中天弊竇肅清士習端謹多士既不敢以不正倖進而臣猶諄諄以守職安命相戒者感

聖主之遭逢以今日之時之難得而深望多士之始終一轍自勉而勿怠也

樂善堂全集序

鄂爾泰

善者一心之主宰萬化之根源事理會歸之極則也然
非實有所樂乎此則見之不真信之不篤而其發為文
章著為事業者終不能篤實輝光可傳於後世

皇四子寶親王性資純粹自幼為

聖祖仁皇帝所篤愛

特召育於宮中薰陶

德教

皇上切義方之訓廣延師保諮經稽史惟日孜孜所以
培養德性恢閎學識者既厚且深矣爾泰以封疆之臣
入叅政事恭承

恩命獲侍

講筵竊見

皇子動容出辭溫肅之氣具備偶聆議論則窮本探原
有經有緯未嘗不私慶

皇子秉元善之德而誠心體道不獨文學迥出乎尋常

也間出樂善堂文鈔若干卷以示開章二篇則曰立身以至誠為本讀書以明理為先此我

皇上御書以訓勉

皇子者而即首以命題所為念茲在茲以迪元德而會眾善者莫不基於此矣至於推闡經義尚論古人窮極事理辨析羣言實有特出之見超乎前賢思議之外其或敷揚功德吟咏性情可歌可誦使讀者忠孝悱惻之情油然而生蓋

皇子樂善之誠充積於中而英華外發有不知其然而然者昌黎韓愈所謂原於仁義而其言藹如者於是集見之矣竊考六籍所載言善者甚詳而樂善一語獨發之孟子與道性善稱堯舜之旨更相表裏

皇子誠由斯集而充之明善以誠身本之心而驗之事則精一危微之訓上接列聖之心傳者莫不於此會其極而世際昇平太和翔洽皞皞焉各相感於至善之中而可以被之賡歌垂之簡冊者其善為何如其樂又何

如也謹序

欽定四庫全書

皇清文獻
卷十七

壬戌會試錄序

鄂爾泰

皇上御極之七年

臣

鄂爾泰恭承

丕命再主春官之試於時羣士之集都下者五千九百九十三人三場畢糊名易書以達內簾者五千七十三卷

臣

敬偕副考同考諸臣殫心甄別錄定正榜三百一十九名明通榜六百九十名榜既揭例取義法尤合者

鋟板以呈

御覽

臣

竊惟科舉之設蓋倣有虞氏敷奏以言及周官

以三物賓興兼用六藝之遺意然后變典樂必以直溫
寬栗為先鄉大夫興賢必以六德六行為本故後世設
科取士詩賦論策皆不若制藝為得其宗蓋使蒙士束
髮受書即日誦五經四子之言則忠孝仁義之大原可
以粗知其意至為文以代古聖賢人之語則其理之出
入離合學之純駁淺深分寸毫釐不能自掩自揣摩之
說起而實學衰凡鄉會試命題所不及者雖本經四書
之傳注多置而不講其他經史子集蓋有終其身而未

嘗一見者矣

世宗憲皇帝憫俗學之卑靡特頒

聖訓制義必以清真古雅為宗我

皇上引而伸之諄諭文以載道與政治相通宜務質實
而言有物

聖謨洋洋豈惟於制義之根源闡括無遺即古帝王典
學興賢之本意可以一貫之矣蓋必研極經書潛心傳
注明於理而後文能清真必博觀載籍挹取羣言優於

學而後文能古雅至於質實而言有物則必性質高明
學有根柢濟於實用然後可庶幾焉故曰即末以操其
本可八九得也

臣

別擇聞藝實持此以為繩墨權衡其

盡合者雖不可多覲然必偏得其一端始收而錄之蓋
嘗鑒觀前代科舉所得之人才其能以清謹奉職者其
文多修潔而安詳其能以猷畧濟時者其文多沉雄而
閎達其能以忠貞抗節者其文多卓烈而光明所謂文
以載道與政治相通者於斯可畧見矣

臣

之所未能自

慊者邇歲精力漸衰雖矻矻披覽而此心怵怵未免有
屈抑英才之懼耳故因進試錄推原古今教學之源流
明彰兩朝

聖主陶冶羣材之德意庶幾士之已進者爭自濯磨未
遇者識所祈嚮而凡有職於文教者皆可以自審焉

學規類編序

蔡世遠

中丞儀封張先生以伊洛之傳開閩中正學仰體

皇上崇儒重道訓飭士子之意特設正誼堂於三山會
城手訂學規類編一書示學者以從入之方用功之要
書成命世遠序之因述先生之意而竊有言曰堯舜禹
湯文武周公之道至孔子而大明孔子之道至孟子幾
息而復明孔子孟子之道至周程張朱久息而復益明
凡其循循啓迪皆使人復其性而已其要有三曰主敬

曰窮理曰力行不主敬則無私之體何以澄之不窮理則天下古今當然之則何以考之不力行則所謂道聽塗說而已何由有以復其性之本然哉明儒有言道學不明士子或趨於勢利或溺於詞章或流入於禪學世遠竊以今世之病大半在於勢利詞章其後焉者也禪學又其後焉者也士子束髮受書凡父所以教其子師所以教其弟者不過拾科第取利祿為急務身心性命有如外物甚或攀緣趨附以為進身之階幸而得志

則以持祿固位肥身保家為長策其有能卓然自立成
一家之言足以垂不朽者有幾人哉宋之眉山明之北
地詞章之雄者也雖其於道未能有聞然素所樹立類
皆高自位置有所不為豈肯與夫已氏者決榮辱得失
於夫夫之口哉今之以詞章自名而不雜於勢利者實
未數數見故曰今世之病詞章其後焉者也宋朝當理
學昌明之會周程張朱數君子比肩而起德性問學之
功昭昭若揭於天壤學者有厭苦於格物窮理之煩者

倡為心學之說恃其超悟凌躡等級一以致虛立本為宗其弊不為佛氏明心見性之學不止是以有心斯道者起而攻之然其為人大都義利辨取與嚴出處正特以學術之差有以誤天下後世不能不急為辨耳今之人方且營營逐逐於外而無所止尚慮其流入為明心見性之學哉故曰禪學又其後焉者此也先生以一代醇儒當倡明絕學之任欲返禪學於道樂詞章以正而力起夫勢利者隱微深錮之病首刻是書尤為深切著

明學者苟能純主敬之功窮理力行以復其性之本然
將歷聖相傳之道萬古猶一日也洛閩之學其復興乎

欽定四庫全書

皇清文獻
卷十七

古文雅正序

蔡世遠

康熙乙未歲余自京師回閩家居數載評選歷代古文自漢至元約二百三十首子弟及門私自抄誦未敢以問世也雍正元年

特召入京與同志李君立侯張君季長參論考訂又是正之高安朱可亭先生迨季長作令長洲取以授梓余因而序之曰是選也採之各家文集者若干卷採之二十一史者若干篇若漢魏之叢書文選文粹文苑文類

以及名臣奏議偶有所喜則登之文雖佳非有關於修身經世之大者不錄也言雖切而體裁不美備則賢哲格言不能盡載也其事則可法可傳其文則可歌可誦然後錄之不及三傳檀弓者檀弓經也三傳雖傳經也不及戰國策者多機知害道之言也荀韓莊列不載者斥異學也嗚呼虛車之飾與犬羊之羶交譏也不加體察躬行之功徒誇閎博雕鏤之用先儒之所羞稱也言不能以足志文不能以行遠亦大雅之所弗尚也措之

為君臣父子夫婦昆弟朋友之倫發之有經國大業不
朽盛事之美言為心聲辭尚體要斯集之所由選乎凡
余所評論自寫心得不倫不次貽笑大方弗恤也名之
曰雅正者其詞雅其理正也

欽定四庫全書

卷十七

皇五子奉

命祭告

闕里文廟序

蔡世遠

堯舜禹湯文武周公之道至

孔子而集其成漢唐以來尊崇效法各致其隆至我

皇上而立其準心源契道法昭封五代以報功詣太學
而親享巍乎煥乎古未有也雍正八年九月重建

闕里文廟告成黃瓦畫棟悉倣

宮殿制度搏拊干戚鐃俎豆籩之器

頌自上方

皇上御書碑文勒石垂之永久禮部奏請遣官祭告

上特重其典

詔皇五子承命以行世遠與

皇子晨夕相講論者八年於此矣可無一言以敬獻乎

夫清明在躬志氣如神希賢聖而則古先

皇子平日之澡浴者然也茲奉

君父之命以往未事之先蠲潔其心志儼恪其身容齊肅有加焉入

聖人之里遊

聖人之門仰瞻大成殿大成門

皇上之御筆也門曰聖時曰弘道

皇上之所手定也瞻

聖人之像貌盥薦奠筭明禋拜稽如睹其溫良恭儉讓之休也如聆其金聲玉振之範也如親其博文約禮之

教也共祀一堂及兩廡者為四配為十一哲為七十二
子為漢唐以來諸儒示我周行如臨師保顏子之克己
子路之喜聞過孟子之集義皆可師也漢儒之傳經宋
儒之體道皆可誦而可法也先哲後賢內聖外王其揆
一也

皇子念之哉禮畢謁

孔林如泰安州祀事泰山夫

孔子之道猶泰山然登泰山之巔必由泰山之麓精義

入神必始於敦倫體信孔子曰孝弟之至通於神明光
於四海無所不通孝弟其至近而可循者乎曾子傳一
貫之旨以告門人曰夫子之道忠恕而已矣忠恕其至
切而有要者乎此與登山之說何異

皇子念之哉肅將

君命祇謁

聖居近取諸身心道行於家庭對越昭事罔有斁焉此
之謂有恪此之謂受福此之謂敬

親此之謂法

聖

廣西通志序

李紱

地必有志所以大一統徵文獻備王會之盛而尊朝廷也其事甚難僻遠則尤難廣西在嶺以南禹跡所不至然南交之宅首見於虞書堯山舜祠在焉通冠裳不可謂不久陳祭酒父子起蒼梧治春秋請立左氏學文章爛然江以南著述未有先於廣西者也顧其地雜犛獠矜狼土府州縣尚若與流官相半號為難治自秦史祿鑿靈渠導湘灘二水始開其地戍卒旋殲漢罷朱崖至

馬新息而後安唐啓南服設總管頗鎮定至宋儂氏之
亂邕筦以北守土率棄城走有明滕峽之役韓襄毅稱
偉績田州岑猛衆至十萬合楚粵師數歲莫定起王文
成於家始撫定其衆併破八排磨崖紀勲伐其難治若
此故唐虞以來三四千年而文物未能擬於上國山川
磅礴鬱積之氣固必待至盛之時而後開也我

國家威德之廣超越三古

世祖皇帝統一海宇

聖祖皇帝深仁厚澤六十餘年朔南暨訖三代以來所未有今

皇上聖明繼述道一風同自

國初至今垂百年廣西無枹鼓之警寅卯之亂吳耿逆命蔓延南土廣西處其中傳將軍弘烈以戍卒一呼九郡響應較滇閩首先反正則其沐浴於

聖化也深矣雍正二年余奉

簡命撫茲土宣揚

帝德與民人更始闢書院訓課諸生多士彬彬幾與鄒魯等念山川風氣應

昌明之運光天之下蠻煙瘴雨氛消沴息今之廣西非昔之廣西也考文徵獻以備

王會一統之盛典時乎其不在茲乎廣西有志始於吾鄉先達周督學孟中繼之者南海黃公佐其書並亡今存者前巡撫定州郝公浴所修兵燹之餘粗具崖畧而已因走伴載家所藏書三千餘部延友蒐纂以諸史為

宗政事之餘親加商榷別立凡例山川風土沿革建置
刊正譌誤數百條鄉賢增十之五名宦增十之七藝文
增十之九藁方脫旋奉總督直隸之命乃以校刊屬按
察使甘君君以名進士起家樂觀厥成明年有

詔命君撫廣西君為之益力比秋來告曰書成矣願序
其端因書其緣起以見山川風氣之盛待

聖明之時而後大顯蓋誠有時焉而非偶然也

壬戌會試錄後序

汪由敦

聖天子觀人文以化成天下興賢育才聲教四訖籲俊
賓興之典以時舉行乾隆七年歲在壬戌貢士之集禮
部者五千餘人

皇上特命大學士伯

臣

鄂爾泰尚書

臣

劉吳龍主試事

臣由敦偕副都御史

臣

仲永檀副焉既竣事得士如

欽定之額循例錄文二十二篇恭進

御覽

臣

竊惟

國家旁招俊乂布列庶位進士實為高選是故甄於庠序貢於鄉會於春官程之以三試嚴之以糊名易書與是選者

臨軒而親策之最其甲乙而授之職凡為是委曲繁重以肅登進之途者非故為難也重其選則取之不得不嚴取之嚴則辨之不得不審夫將起草茅而縈以爵祿政事之是圖民生休戚是寄安得而不難諸安得而不慎諸承是役者上以念

聖朝作人之德化如其厚也求才如其誠也異日之任用如其優也下以念多士之踴躍功名思挾所有以自效又如其迫也斤斤於去取之際毫釐之未慊則仰無以副

簡任而俯無以對多士且臣聞之文章闕乎氣運持風會於全盛之日視起衰為尤難光嶽氣完人才輩出智能瓌異之士百出其心思才力以角一日之長而或橫溢而不衷於度或尋虛逐微而不當於理其新可喜其

怪可愕為所眩而不之察慕效者以是為詭遇之捷徑
旁鶩而不可止偽體流傳經術之蠹也風會所趨歸其
責於衡鑒之不審其奚所辭咎我

列祖教澤涵濡重熙累洽

聖天子建中和之極金聲而玉振之慶霄在上萬物五
色郁郁乎文明全盛之會倬彼雲漢昭回於天周文公
所為歌棫樸也藹藹王多吉士維君子使媚於天子召
康公所為頌卷阿也求賢用吉士用勸相我國家其道

在慎持之而已臣幸從二三臣後黽勉將事於所謂難之難慎之慎者竊斤斤焉錄成敬以綴於簡末

明史功臣表序

汪由敦

自昔帝王受命驅策羣力以有天下迨區宇既寧疇庸
論功列爵崇報一時攀鱗附翼之士奮起兜牟之中剖
符析珪爰及苗裔德意厚矣唐宋以來稍異曩制房喬
遠勢首讓世封是以英衛子孫齒於厯隸而宋代勲階
祇崇虛號祖孫父子各擬名邦初無世及之文非復承
家之舊至明祖開基乃曠然復古凡熊羆之宿將帷幄
之謀臣生著號而歿襲封茅土之頒殆逾百數馴及季

年黨獄蔓延剗削芟殊存者不及三四然觀鐵榜所列
訓誡之辭則河山之誓白馬之盟初意固不其然高危
滿溢亦其自取焉耳乃若文皇差靖難之勞英宗懋奪
門之賞跡參佐命籍次元功以視開國諸臣亦曷可同
年而語乎世宗中葉開冊府之舊藏修繼絕之墜典於
是鄂曹衛信之裔復列徹侯延其世緒天下翕然歸厚
雖宋潁韓淇終於勦絕而自餘推誠宣力名載丹書者
奕葉紹蟬保守祿位典宿衛領京營鎮陪京督漕運寄

隆方岳階晉公孤家分典瑞之榮朝無酎金之罰較諸
西京世胄殆將過之今考其襲替歲月見於實錄者作
功臣表以與紀傳相表裏或牴牾散軼時世無可考稽
則畧而不書固史氏闕文之義云耳

明史儒林傳序

汪由敦


粵自司馬遷班固創述儒林著漢興諸儒修明經義之
由朝廷廣厲學官之路與一代政治相表裏後史沿其
體製士之抱遺經以相授受者雖無他事業率類次為
編宋史判道學儒林為二以明伊雒淵源上承洙泗儒
宗統緒莫正於是所關於世道人心者甚鉅是以載籍
雖繁莫可廢也明太祖起布衣定天下當干戈搶攘之
時所至徵召耆儒講論道德修明治術興起教化煥乎

成一代之宏規雖天亶英姿而諸儒之功不為無助也
制科取士一以經義為先網羅碩學嗣世承平文教特
盛大臣以文學登用者林立朝右而英宗之世河東薛
瑄以醇儒預機政雖弗究於用其清修篤學海內宗焉
吳與弼以名儒被薦天子修幣聘之殊禮前席延見想
望風采而譽隆於實詬誅叢滋自是積重甲科儒風少
替白沙而後曠典缺如原夫明初諸儒皆朱子門人之
支流餘裔師承有自矩矱秩然曹端胡居仁篤踐履謹

繩墨守儒先之正傳無敢改錯學術之分則自陳獻章
王守仁始宗獻章者曰江門之學孤行獨詣其傳不遠
宗守仁者曰姚江之學別立宗旨顯與朱子背馳門徒
徧天下流傳逾百年其教大行其弊滋甚嘉隆而後篤
信程朱不遷異說者無復幾人矣要之有明諸儒衍伊
雒之緒言探性命之奧旨錙銖或爽遂啟岐趨襲謬承
謠指歸彌遠至專門經訓授受源流則二百七十餘年
間未聞以此名家者經學非漢唐之精專性理襲宋元

之糟粕論者謂科舉盛而儒術微殆其然乎今差別其人準前史例作儒林傳有事功可見列於正傳者茲不復及其先聖先賢後裔明代亟為表章衍聖列爵上公與國終始其他簪纓逢掖奕葉承恩亦儒林盛事也考其原始別自為篇附諸末簡以備一代之故云

皇清文穎卷十七



總校官庶吉士 臣 張能照

校對官檢討 臣 郭 寅

校對官庶吉士 臣 何思鈞

謄錄監生 臣 牛繼祖

財團法人
佛陀教育基金會
釋淨空
敬贈

